

VĒSKS APLE LĒNUS

**DAUG RONKRAŠTIU, KATRŪS
OŽRAŠYTĖ MŪSA KRAŠTA SENŪ
ŽMIONIŪ ATSEMĖNĖMAA APLE
ŽEMAITIU DARBUS, BUTI, SVĖNTĖS,
PAPRUOTIUS, SAUGUOMA
KRETINGUOS MOZIEJŪ. DAUG
ANŪ ĆE YR PALĖKĖS MOZIEJAUS
BOVĖS DĖREKTUORIOS
MICKEVIČIOS JUOZOS.
DIEKAVUOJEM MOZIEJAUS
DABARTĖNEMS DARBUOTOJEMS,
KATRĖI LEIDA REDAKCĖJE SŪ TAAŠ
RONKRAŠTEES SOSĖPAŽINTĖ.
DALELĖ TŪ PASAKUOJĖMU
PARUOŠIEM SPAUDAA**

KURŠĖ NEŠĖMS

1920 metaas lėnus mynė Kuliū valsčiaus Luknienu suoduo pas 17 hektaru ūkininka Rupši Ėgnaca. Talkuo bovau ir aš, tumet dar Salytė Marta. Dėrba 9 braukiejee. Lėnamėnė bova vėno arkljo sokama. Arkli varė pėimėnoks, katros bova atsisiedė pri pat arklė oudėguos. Lėnamėnė soka jaujuo. Dontyts rats aukštaa soka šeštamė, vo ta — lėnamėnė. Talka dėrba vėsa nakti. Pryš aušra kaima vaikee padėrba kurši — šiaudėnė vyra čiučėla. Apvėlka anaa stuoas kėnės, palita, sujouse pakulinio pončio, kuojės apmuovė aulėnees medpadees, unt galvuos uždiejė medėnė kaukė: kumpa nuosės, akys, lūpas, ausys, onglim nuteptas, oustaa, barzda, sakaas prilipdyta, plaukaa lėnėnėe, ont pakaušė — jouduos medžėguos skrybelie. Kurši ymetė per mažuosės dorelės pri peludės unt mona kopras. Iš karta jaujuo pasėgėrda jouks: "Va, Martas kavalierios!"

Jaujuo bovė vyraa tujau pradiejė kuršė nešiejus gintėis. Kėik ginies, kėik neginies, bet nesugava ir nesužėnuojė, kas iš anū kurši ymetė. Tumet kurši pametė jaujuo. Už keliū dėinū kurši myniejee sodraskė.

Lėnus toukart pas ūkininku tris paras mynė. Vu tas kuršis bova tuoks špuosas, pasijoukėms iš talkininku. Vaikee tonkee lėnus mindamė liuob sakytė: "Eisem kurši neštė".

**Papasakuojė JANUŠIENĖ
MARTA iš Kuliū valsčiaus Repšaitiu
kaima 1976 metu kuova 13 dėina.**

IŠBINKIAVĖMS

Lėnus mynė naktym. Daug vėsuokiausiu špuosu per tas talkas liuob pridarytė. Išbinkiaavėms liuob būtė dėdliausis žmuogaus pažemėnėms. Kaap tou darė? Pagriebs berna ar mergė kelė vyraa (vėinė už kuoju, kėtė per petius ir užpakali) ir padaužys i lėnū mėnama binki, katramė bova lėnū myniejuo mintovaa. Tas liuob teestėis kuokės pėnkės mėnotės. Binkioujemasis liuob miegintė ištruktė iš myniejuo ronku, šaukė, steniejė, vu binkioujuojee dėrba sava darba ir sotartėnaa šaukė "uraa!". Kėtė talkininkaa veiziejuos, joukies ir šaukė, ka daa daugiau binkiouptom.

**Papasakuojė DIRMEIKIS
ANTANS iš Platėlū apylinkės 1971
metu gegožės 16 dėina.**

LĒNŪ PARUOŠĖMS DRUOBIEMS AUSTĖ

Gerus lėnus, nu mintovu išbrauktus, dar liuob perbrauktė so mintovaa arba brauktovė. Per reta (retaaas dontim) iekeli lėnus liuob iššokoutė, pu tuo sosoktė i gryžolės ir padietė kelėms metams unt truoobuos ar klietės, ka lėnaa išsėstuovietom, pasėdarytom smolkė plaukelee. Tumet pėrmo per retas, vo paskiau per tonkės iekelės liuob lėnus iššokoutė. Pu tuo tuokius lėnus liuob iššokoutė so šerėnio šokoujemo šepetio, supintė i pynelės, išvirintė vundėnie, išdžiovintė. Tumet idies i švari grūstuvi, katramė liuob spėrgėnė krioštė, ir so bakmalio geraa pamoš. Pu tuo išims iš grūstovės, ištėmps, ir per smulki iekeli ar so galvuos šokoujemo šepetio iššokous ir sudies talkuom. Jou geriau liuob iššokous, jou pluonesnė druobė liuob išaus ir jou spindontiesnis audekla rašts liuob būtė.

Tuokės druobės liuob austė puonams, konėgams, bajuorams ir puoniuos kraitiou.

**Papasakuojė P. BRAZDEIKIENĖ ir O.
MICKEVIČIENĖ iš Žemaitiu Kalvarėjės 1956
metu spalė 19 dėina.**

Ožrašė J. MICKEVIČIOS.



**Kretinguos tautodailininks, dėdiesis šaukštu
meistros ŽYMANTS BRUONISLUOVS.
ALEKNAVIČIAUS BERNARDA puortėgrapėjė**

TURINYS

1 psl. "Žemaitiu žemė" — "A mon sakaa?" teesinys.

2-3 psl. KASPARAVIČIOS STASYS. Perduokem ugni, vuo ne pelėnus.

4-5 psl. ŽELVYTĖ DANGUOLĖ, VYŠNIAUSKS JUOZOS. Gryžt vaakaa i sava gimtėnė.

6 psl. KUCKAILIENĖ GENUOVAITĖ. Papėlė ir 1963 metu sokėlėms.

7 psl. SALATKIENĖ ALINA. Aplonkykėt Žemaitėjė.

8 psl. BUDRIECKIS VAIDS. Biržėškaa Vacluovou - 110.

9 psl. ELEKŠIS JUOZOS. Pamin-klos Biržiškuoms Vėikšniūs.

10 psl. G. VASILIAUSKAITĖ. Pėrmas Lietovuos jūru kapituoons L. Stulpėns.

11-12 psl. PUOCEVIČIENĖ LAI-MA. Pečkauskaitė Marijė (Šatrėjės Ragana) Žėdėkūs.

13 psl. S. TAMAŠEVIČIOS. Palonguos "Gintėis" alka.

14 psl. Medininku (Varniū) vyskopaa.

15-16 psl. KANARSKAS JULIOS. Kretinguos pėlės.

17 psl. RAVICKIENĖ ELEUONUORA. Mėrės miests.

18 psl. ŠVEREBS PUOVĖLS. Maželkiu gamtuos paminklaa.

19-20 psl. KANARSKAS JULIOS. Istuoriks ir tautuosakininks.

20 psl. MICKEVIČIOS JUOZOS. Muzikinis kultūras vystymasis Kretinguo iki XX omžiaus vėdorė.

21-24 psl. ANDRIUSEVIČIOS JUONS. Pri Šatrėjės.

25-26 psl. MUKIENĖ DANUTĖ. Medė ir gruožė vergs.

27 psl. BAGDUONS APUOLINARS. Puoėzėjė.

28 psl. BORUSEVIČIŪTĖ-ŠIDLAUSKIENĖ ELĖNA. "Neišsižaduo — neišsižadiesiu".

29 psl. BAUŽIENĖ BERNADETA. Palonguo.

30 psl. Polkuors. "Mėguva".

31 psl. Skomb dainės Žemaitėjės šėrdie. Loukės etnuograpėnis ansamblis.

32 psl. Buočiu išmintėis skrynelė.